

Öise Lade 2-2010, p. 54

Grassins e crocants, tatsch, pul e bugliarsa... jau pudess anc enumerar blers tals nums. Cun quels pudess'ins far ina bella poesia. Sch'jau prelegel els a mia figlia da 16 onns, fa ella ina tschera curiusa. «Quai na san ins tge ch'igl è, quai



Bizochels, flutgets e maluns

na mangiass jau mai» declara ella categoricamain, analog al conuschent proverbi da purs. Schnipo conuscha ella perencunter bain avunda. Qua sa mintgin tge ch'igl è, numnamain in past gustus e solid. Ma tge èn pomai grassins? Probabel fan els mo gross. Ed il pled bugliarsa? Quai tuna dad insaquala buglia indefinibla. L'arrivada da McDonald en nossa vischinanza ha midà las modas. Igl è daventà schic dad ir ordaifer a mangiar pommesfrites cun ketchup e baiver cocacola. Dentant betg sulet l'American ha cumenzà ad influenzer las disas da mangiar. Pizza e pasta tutgan oz tar ils pasts preferids dad uffants e creschids. Piccata, risotto e pizza èn entrads en noss mintgadi. Quai che era ier ester ed exotic, è oz «normal». La moda dovra simplamain temp per vegnir acceptada. Avant 50 onns mangiavan tuts barbalada, flutgets, e grassins. Ed oz? Jau As pos tradir insatge interessant: La cuschina genuina grischuna vegn adina a pudair exister. Gist actualmain è il cuntrari da constattar: Ils megliers cuschiniers svizzers experimenteschan cun vivonda tradiziunala, ils giasts giudan las novas creaziuns cun recepts vegls. Era mattas da 16 onns han gugent variaziun, ellas sa laschan schizun intgantar da la «nova» barbalada.

Augustin Beeli

Augustin Beeli